



CENTRAL BANK OF SEYCHELLES

P. O. Box 701, Victoria, Seychelles

Tel: + (248) 4 282 000; Fax: + (248) 4 226 104

Website: www.cbs.sc

KOMINIKE LAPRES

Viktorya – 26 Zen, 2018

Bord Labank Santral i mentenir en polisi moneter sere an vi ki previzyon i montre logmantasyon dan to lenflasyon pandan kourt e mwayen term.

An linny avek son manda pou asir stabilite dan pri lo marse lokal, Bord Labank Santral in deside pou mentenir en polisi moneter sere pour trwazyenm kar 2018. Bord in pran kont ki nivo lenflasyon i pli o konpare avek lannen pase e ki sa i ekspekte kontinyen pandan larestan lannen.

Lo marse enternasyonal, nivo pri komodite pe kontinyen ogmante. Sa i enkli pri karbiran ki tre enportan pour lekonomi an term prodiksyon, transportasyon e lenerzi. An plis, desizyon bann labank santral a letranze i kapab afekte to lesanz ant ero e dolar ameriken ki ekspekte ganny reflekte lo valer roupi dan marse domestik.

Bann faktor domestik tel ki lakantite kredi ki pe ganny pran par sekter prive i osi lo en nivo ki kapab koz plis lenflasyon. An se moman laplipar nouvo loan ki pe ganny pran i pour konsonmasyon e non pa lenvestisman. Lefe revizyon dan sistenm taks progresiv e nivo lenvestisman dan lenfrastriktir i osi ekspekte ogmant nivo demann dan lekonomi. Anvi ki nou enport preski tou sa ki nou konsonmen, sa bann developman i kapab fer ki evantyelman pri deviz i monte e an konsekans ganny reflekte dan logmantasyon pri komodite ek servis.

Malgre ki demann i enportan pou soutenir kwasans ekonomik, demann ki an ekse i kapab koz lenflasyon. Alor i nesaser ki bann polisi i ganny revwar pour asire ki lobzektif prensipal Labank Santral, pou mentenir stabilite dan pri lo marse domestik, i ganny prezerve.

Prenan kont tou sa la, Bord Labank Santral in deside pou mentenir en polisi moneter sere, ki vedir retir likidite dan sistenm banker e ankouraz en lanvironnman savings. Sa i reflekte dan to lentere ki aplikab lo bann tranzaksyon ki Labank Santral i fer avek bann lenstitisyon finansyel. To lentere ki sa bann lenstitisyon i resevwar ler zot depoz larzan ki an ekse a lafen lazournen pou reste 2.0 pousan (2.0%). Dan menm lalinny, kan sa bann lenstitisyon i vin pret larzan avek Labank Santral, to lentere ki zot pou ganny sarze pou reste 8.0 pousan (8.0%).

Baze lo sa desizyon, piblik pa ekspekte vwar en bes dan to lentere ki bann labank komersyal i sarze. Sa i vedir ki lanvironnman i reste konvenab pour savings. A longer ditan, sa sanzman dan polisi moneter i ekspekte redwir demann pou bann fasilite kredi, e osi komodite ek servis an zeneral. Sa i ava met mwens presyon lo to lesanz e fer ki lavironnman ekonomik i siport stabilite dan pri.

Labank Santral pou kontinyen obzerv developman dan lekonomi e pou reakte kan i nesaser pou fer sir ki son polisi i an linny avek son lobzektif prensipal pou mentenir stabilite dan pri lo marse lokal.